



ВЫЛЬ СІЗЕН



ОТДЕЛ
РЕЛИГИОЗНОГО
ОБРАЗОВАНИЯ

ПАВЕЛ АПОСТОЛЛЭН ЕФЕС КАРЫН УЛЙСЬЁСЛЫ ЫСТЭМ ГОЖТЭТЭЗ

1-тй ЛЮКЕТ

¹Мон, Павел, Инмарлэн эрикеныз бырьем Иисус Христослэн апостолэз, Ефесысь Иисус Христослы осконэн улйсьёслы, вöсяськись калыклы: ²Инмар Атаймылэн но Кузё-Инмарлэн Иисус Христослэн дэлетэз, каньыллыкез тй бордын мед улоз.

³Данъямын мед луоз Инмар, Кузё-Инмармылэн Иисус Христослэн Атаез. Асьмелы Христос бордын Инмысь котькыче но духовной зечлыкъёс сётыса, Со асьмеды бакель кариз. ⁴Дунне кылдытонлэсь азьло Инмар асьмеды Христос бордын бырйиз, Аслаз аяз асьмеос дун-сьöлыктемесь, дун-шектэмесь мед луомы, гажан-жалянэн мед уломы шуыса. ⁵Аслаз зеч эрикезья, Иисус Христос пыр асьмеды Со азьвыл ик Аслыз нылпи карыны малпаз. ⁶Солэсь данлыко дэлетсэ мед ушьяломы, сое Со асьмелы, Яратоно Пиез бордын улйсьёслы, кузьмаз. ⁷Яратоно Пиез бордысен, Солэн Вирыныз асьмеос сьöлыкъёслэсь мозмытскимы. Солэн туж бадзым гажан-жалянэз ванен – сьöлыкъёсмы куштйськизы. ⁸Бадзым визьлыкен, валаса Со дэлетсэ асьмелы пачылаз сётйз. ⁹Ачиз зеч мылкыд карыса, Со Аслэсьтыз Христосэн герзаськем малпанэзлэсь ватйськыса улйсь зэмлыксэ асьмелы усътйз, – ¹⁰Инмарлэн сётэм дырыз ке вуиз, Инмысьсэ но, музьем вылысьсэ но – Христослэн

кивалтэм улсаз, Инмар ваньзэ огазе кароз.
¹¹⁻¹²Ваньзэ Лэсьтйсьлэн малпамезья-планэзья, азь-
выл ик Аслаз чакламезья, Христос пыр ми, ны-
рысьёсыз Христослы оскисьёс, Инмарлэсь дан-
лыксэ вылэ жутон понна люкет басьтйсьёс луимы.
¹³Эмлыклэсь кылзэ, утиськондылэсь Зеч Иворзэ
тй но кылйды. Собере Христослы оскыны кутс-
киды но Со бордын улэмды понна сйзем Святой
Духез Инмар тйледлы сётйз. Озыы тй Солэн адя-
миосыз луиськоды шуыса Со возьматйз. ¹⁴Солэсь
данлыксэ вылэ жутон понна, Святой Дух азьпал
люкет басьтонмылэн оскытонэз луэ: Инмар асьме-
мыз, асьлэсьтыз адямиоссэ, сьöлыкьёслэсь моз-
мытоз.

¹⁵Тйляд Иисус Христослы осконды, ваньзэс вö-
сяськисьёсты яратэмды сярысь кылй но, ¹⁶чик дуг-
дылытэк, тй понна Инмарлы тау карисько. Тй
понна вöсяськисько, ¹⁷Кузё-Инмармылэн Иисус
Христослэн Инмарез, данлыклэн Атаез, Сое мед
тододы, тйледлы бадзым визьлыклэсь но усьтйсь-
конлэсь Духсэ мед сётоз шуыса. ¹⁸Сюлэмдылэсь
синьёссэ мед югдытоз, тй мед тододы кыче со
оскиськон, кудаз Со тйледыз öтиз. Макем бадзым,
дано вöсяськись калыклэн басьтоно люкетэз, ¹⁹ма-
кем бадзым, лыдьянтэм асьмелы, Инмарлы ос-
кисьёслы, Солэн сётэм кужымез! ²⁰Аслэсьтыз со
кужымзэ Инмар Христос пыр возьматйз, куке Сое
кулэмысь улзытйз, Инмысен Аслаз бур палаз
пуктйз но ²¹котькыче кузёйырьёслэсь но кивал-
тоньёслэсь, кужымьёслэсь но кузёяськоньёслэсь,
котькыче нимлэсь-данлэсь но таяз улон даурын

гинэ өвөл, вуонояз даурын но выльегес кариз. ²²Инмар ваньзэ Христослэн пыд улаз тэрытскись кариз. Сое ваньмызлэсь вылье пуктйз, Черклы йыр кариз, ²³нош Черк Солэн Мугорыз луэ. Христос ваньзэ тырмытыса, пачылмытыса возе.

2-тй ЛЮКЕТ

¹Тй но асьтэлэн йыружъёсыныды, сьöлыкъёсыныды сэрен кулэмын вал ни. ²Куке но тй сьöлыкъёс пöлын улйды, та дуннеын улонлэн сямъёсызъя, омырын кузёяськись эксэйлы, со духлы тэрытскыса улйды, кудйз али но Инмарлы пумитьяськисьёсын кивалтыса улэ. ³Азьвыл асьмеос но соос кадь ик лулмугормылэн кулэяськонъёсызлы тэрытскыса, лулмугормылэсь но малпанъёсмылэсь кулэ каронъёссэс быдэсьяса улймы. Куке но ваньмы асьмеос, мукет адямиос кадь ик, Инмарлэсь вожпотонзэ чиданы кылем нылпиос вал. ⁴Но гажан-жалянэн узыр Инмар, Аслаз быдзым яратонэныз яратйз ⁵асьмеды, – йыружъёсмы понна кулэмъёсты, Христосэн валче улзытйз, – Инмарлэн гажан-жалянэныз тй утемын вал. ⁶Соин ёош кулэмысь улзытйз но Инмысен Иисус Христос борды пуктйз, – ⁷асьмелы, Иисус Христос бордын улйсьёслы, Аслэсьтыз зеч мылкыдзэ, дэлетлэсь туж бадзым узырлыко луэмзэ вань вапумъёс ёоже возьматон понна. ⁸Уго оскон пыр тй Инмарлэн гажан-жалянэныз утемын. Но со утиськон тй бор-

дысь уг поты, со – Инмарлэн кузьымез. ⁹Уж понна но со өвёл, нокин но медаз ушъяськы. ¹⁰Асьмеды Инмар кылдытйз, Иисус Христос бордын зеч ужъёс лэсьтыса улон понна асьмеды Со кылдытйз. Зеч ужъёс лэсьтыса мед уломы шуыса Инмар азь-
выл ик соосты дасяз.

¹¹Тодады вае: кылдэмдыя тй куке но язычникъёс вал. Вандйськон сямзы мугор вылын, адями кыын гинэ лэсьтэм ”вандйськемъёс” шуыса нимась-
кисьёс тйледыз ”вандйськымтэос” шуо вал. ¹²Тода-
ды вае: со виын тй Христостэк улйды. Израиль
калыклэсь тй палэнтэмын вал, сйзиськонлэсь ку-
рон-косонъёссэ уд тодйське вал, оскиськонды ой
вал, дунне вылын Инмарлы осконэз тодытэк улй-
ды. ¹³Нош табере тй, куке но Инмарлы кыдёкын
сылйсьёс, Иисус Христос бордын, Солэн Вирыз
пыр Инмарлы матэ луиды.

¹⁴Уго асьмелэн тупаса улонмы – Со Ачиз. Еврей-
ёсты но язычникъёсты Со одйг калык кариз, кус-
памы сылйсь могзетэз – тушмоньяськыса улонэз,
– Аслаз лулмугорыныз куашкатйз. ¹⁵Моисейлэсь
курон-косонъёсын законзэ воштйз. Ачиз бордын
кык калыклэсь одйгзэ – вильзэ адямиез кылдытйз,
асьмелы тупаса улон ваиз. ¹⁶Кирос бордын кулыса,
кыксэс калыкъёсты одйг мугор, Инмарен тупась
кариз, куспазы тушмоньяськыса улонэз быдтйз.
¹⁷Христос лыктйз но тйледлы, кыдёкысьёслы*,
милемлы, матысьёслы** но, тупаса улон тодыты-
ны кутскиз, ¹⁸малы ке шуоно, Иисус пыр, одйг

* 2:17 Язычникъёслы.

** 2:17 Еврейёслы.

Духен асьмеос Атай доры кариськыны быгатйськомы. ¹⁹Озьыен, табере тй мурт адямиос, пыртос калык өвөл ни, табере тй вань вöсяськисьёсын ёош одйг семья, Инмарлэн адямиосыз луиськоды. ²⁰Апостольёслэн но пророкёслэн юнматэм инъет вылазы тй жутэмын, нош со инъетлэн возись изээ Ачиз Иисус Христос луэ. ²¹Со бордын быдэс юрт возиське, радысь радэ пуктйськыса вылйе жутйське но Кузё-Инмарлэн святой храмез луэ. ²²Христос бордын улыса тй но мукетъёсын ёош Дух пыр Инмарлэн улон юртэз луиськоды.

3-тй ЛЮКЕТ

¹Со понна ик мон, Павел, тйледлы, язычникъёслы луыса, Иисус Христослэн пытсэтын пукисез луи. ²Тй кылйды, дыр, ини, тйледлы Инмарлэсь гажан-жалянзэ тодытон мыным сётэмын вал шуыса. ³Инмар мыным ватйськыса улйсь зэмлыкез усьтйз, со сярысь мон вылйын вакчияк тйледлы гожтй ни. ⁴Сое лыдзыса тодыны быгатоды, кызы мон Христос сярысь ватйськыса улйсь зэмлыкез валаны кутски. ⁵Азьвыл улэм адямиослы та ватйськыса улйсь зэмлык ивортэмын öй вал, кызы сое али Христослэн святой апостольёсызлы, пророкёслы Святой Дух усьтйз. ⁶Усьтйськем зэмлыклэн пуштросэз луэ та: мукет калыкъёс но Зеч Ивор пыр локет бастйсьёс луо, соос иудейёсын

җош одйг мугор кылдыто но Иисус Христос бордын сйзиськонэз басьтыны быгато. ⁷Инмарлэн мыным сётэм дэлетэныз, кужыменыз Инмарлэсь Зеч Иворзэ тодытонын мон ужась-тыршись луи. ⁸Мыным, вöсьяськисьёс пöлысь самой покчиезлы, таҗе дэлет сётэмын: Христослэсь мертаны луонтэм узырлыксэ – Зеч Иворез язычникъёслы тодытон ⁹но Инмар малпанлэсь ватйськыса улйсь зэмлыксэ ваньмызлы усьтон. Сое, пумтэм вапумъёсысен кутскыса, Иисус Христос пыр ваньзэ кылдытйсь Инмар Ас бордаз ватыса возиз. ¹⁰Черк пыр Инмысь вылй кылчинъёслы, Ин кужымъёслы Инмарлэн пöртэм пумо туж бадзым визьлыкез табере тодмо мед луоз. ¹¹Пумтэм вапумъёслэсь азьло ик лэсьтыны чакламез Инмар Кузё-Инмармы Иисус Христос пыр быдэстйз. ¹²Христос бордын улыса, Солы оскон пыр асьмеос кышкасьтэм луимы, Инмар доры кариськыны оскиськон басьтймы. ¹³Со понна ик мон тйледыз курисько: тй понна мыным курадзёнъёс чидано луэ шуыса жöже эн усе – мынам та курадзёнэ тйледлы дан ваёз.

¹⁴Со понна ик мон Кузё-Инмармылэн Иисус Христослэн Атаез азын пыдесьяськыса сылйсько, ¹⁵Кудйз бордысь инмысез но, музъем вылысез но котькудйз выжы-улы аслыз ним басьтэ. ¹⁶Инмарлэсь курисько: Аслаз данлыкез узыр луэмен, Аслаз Духеныз тйлесьтыд лулдэс-сюлэмдэс мед юнматоз. ¹⁷Осконды пыр Христос сюлмады мед интыяськоз, яратон вылэ пыкиськыса тй выжы



мед лэзёды, соин мед юнматскоды. ¹⁸⁻¹⁹Вань вö-сяськисьёсын ёош, Инмарлэн дэлетэныз-зечлыкеныз пачылмыса улон понна, валаны мед быгатовды, мед тододы макем паськыт но кузь, макем мур но жужыт Христослэн яратонэз. Со котькыёе тодонлыклэсь но выльйын.

²⁰Дан Сола, Кин асьме пушкын ужась кужыменыз, мае куриськомы яке мар сярысь малпаськом-сюлмаськиськом, бадзымлэсь но бадзымгес зечлык сётыны быгатэ. ²¹Иисус Христос бордын быдэс Черк вапумысь вапумьёсы, выжыысь выжые Инмарез даньяса мед улоз. Аминь.

4-тй ЛЮКЕТ

¹Кузё-Инмарлы оскем поннам мон пытсэтын пу-кись луи. Сюлворыса курисько: Инмарлэн өтем улонэзлы тупамон улэ; ²востэм, зйбыт улэ; ваньзэ чидалэ, огдэс огды гажалэ-яратэлэ. ³Одйг духен тупаса, огмылдыдын улыны тырше. ⁴Одйг мугор, одйг дух; озьы ик, кызы вань одйг гинэ оскиськонды но, кудаз тйледыз Инмар өтиз. ⁵Вань одйг Кузё-Инмар, одйг оскон, одйг пылатон. ⁶Вань одйг Инмар, Кудйз ваньмызлы Атай луэ. Со ваньмызлэсь выльйын, Со ваньмыз пыр, Со ваньмы бордын.

⁷Христослэн висьям мертэтэныз, котькудмылы асьмелы нимысьтыз дэлет сётэмын. ⁸Соин ик шуэмын уго:

”Со выліе жутскиз, пленэ сюремьёсты
Аслыз басьтїз,

адямиослы кузьымьёс-саламьёс сётказ”.*

⁹Нош ”жутскиз” шуэм мае возьматэ? Сое ик уг шат, кызыы Со азьвыл ик музьемлэн пыдэсказ васькиз? ¹⁰Васькись Со ик вань но, Кин Аслаз дэ-летэныз дуннеез пачылмытон понна, вань Иньёс-лэсь выліе жутскиз. ¹¹Одїгьёссэ Со апостол, мукетьёссэ пророк, куд-огзэ Ѕеч Ивор тодытїсь, куд-огзэ возьмась, куд-огзэ дышетїсь карыса пуктїз. ¹²Со соосты пуктїз Христослэсь Мугорзэ юнматоньын вёсяськись калыкез ужаны-тыршыны дасян понна, – ¹³ваньмы асьмеос одїг осконэ, Инмар Пиез тодонэ вуытозямы, Христослэн тыр луонэз-лэн арескояз быдэ вуытозямы. ¹⁴Ялан вож нуныос кадесь асьмеос медам ни луэ. Олокыче но дышетоньёсын тунсыкьяськоньёслэн тулкымзы азьлань-берлань медаз ни нуллы, кудьёссэ малпазы кескич адямиос пöяськон ужьёс пыр. ¹⁵Землыкез яратыса верамы ке, соку асьмеос котьмар ласянь Христос дорозь будысалмы, Кудїз ваньмызлы Йыр луэ. ¹⁶Христослэн кужыменыз Мугорлэн вань ёзьёсыз пöртэм пумо герзетьёсын куспазы огазеясько, юнматїсько. Котькуд люкет солы кулэ ужез быдэсья ке, соку яратон пыр Мугор будэ, юнма.

¹⁷Соин ик мон верасько но Кузё-Инмарлэн нимыныз сүлворисько: лэсянтэм-кулэтэм малпаньёсын язычникьёс кадь эн ни улэ. ¹⁸Соос визьмынызы

* 4:8 Пс. 67:19.

сураськемын, Инмар бордын улонлэсь палэнскемын, уго соос тодйсьтэм-валасьтэм, пеймыт калык, сьулэмьёссы измемын. ¹⁹Визьзэс ыштон доры вуизы ни соос: азыса-калгыса уло, котькыче кырсь-юрзым ужез пичи но возьдаськытэк лэсьто.

²⁰Таёе улонлы Христослэсь тй өд дышетске, – ²¹тй Со сярэсь кылйды, Со бордын дышетскиды – уго зэмлык Иисус бордын. ²²Со дышетонья, тйледлы азьвыл улон сямдылэсь но өрекчи куроньёсын сэрен сисьмоно вужмем аями луондылэсь куштйськыны кулэ. ²³Визьмыныды, духеныды мед выльмоды, ²⁴выль аями мед луоды, уго сое Инмар Аслыз укшатыса, шонерлык, зэмлык, дунсьöлыктэм улон понна кылдытйз.

²⁵Соин ик, өрекчаськемысь дугдэ но асьтэлэн матысьтылы шонер кыльёсты гинэ вералэ, малы кешуоно, ваньмы асьмеос одйг Мугорлэн люкетьёсыз луиськомы. ²⁶Йырды кур луиз ке, эн сьöлыкалэ: шунды пуксьыса но медаз вуы, йыркурьяськонды мед кысоз. ²⁷Дьяволлы инты эн кельтэ. ²⁸Кин азьвыл лушкаськыса улйз, азьланяз медаз ни лушкаськылы. Эсьмаса, умойгес мед ужалоз но ас кыыныз пайдаё маке лэсьтыса, ёрмыса улйсьлы маке но сётыны мед быгатоз. ²⁹Нокыёе но сисьмем кыл тйляд ымысьтыды медаз поты. Зечьёсыз гинэ, осконэз юнматйсь-дышетйсь кыльёс гинэ ымысьтыды мед потозы. Кылзйськисьёссы соос пайда мед ваёзы. ³⁰Инмарлэсь Святой Духсэ жоже эн уськытэ, Солэн печатеныз тй пусьемын, мозмытскон нуналды вуыкулы. ³¹Керзегьяськыса, йыркурьяськыса, вождоттыса, лек кыльёсын ке-

ретыса улон, – вань урод ужъёсын чош тй пöлысь быдтэмын луыны кулэ. ³²Ог-огеныды лякытэсь, гажась-жалясесь луэ, огдылэсь огды сьöлыкъёстэс куштэ, кызы Инмар Христос пыр тйлесытыд сьöлыкъёстэс куштйз.

5-тй ЛЮКЕТ

¹Инмарлэн яратоно нылпиосыз луйськоды бере, Инмарлэсь адзем карыса улэ. ²Яратонэн улэ, кызы Христос асьмеды яратйз, но асьме понна Ассэ Инмарлы курбон сётйз, – ческыт зыно, Инмарлы ярась курбон.

³Азыса-калгыса улон, пöртэм юрзым-кырсь ужъёс, барыш люкан сярысь тй пöлын вераськон ик медаз потылы. Вöсяськись калык сыче ужёсты лэсьтыны кулэ öвöл. ⁴Озы ик, юрзым кылын вераськон, юнме супыльтон, серекъян-горон но тйледлы уг тупало. Соос интые, тй дорысь тау карон кыльёс мед кылйськозы. ⁵Тодэлэ уго: нокудйз но азыса-калгыса улйсь, юрзым-кырсь ужъёс лэсьтйсь, барыш люкаса улйсь – сульдэръёслы-идольёслы йыбыртъясь – Христослэн, Инмарлэн Эксэйлыказ люкет уз басыты.

⁶Йöнтэм кыльёсын нокин но тйлесытыд визьдэс медаз сына, медаз пöя, уго со понна тэрытскытэк улйсьёс вылэ Инмарлэн вожпотонэз лыктэ. ⁷Соин ик сыче муртъёсын эн эшъяське. ⁸Куке но тй пеймытлык вал, нош табере, Кузё-Инмар бордын улыса, югытлык луиды. Югытлыклэн нылпиосыз

кадь улэ ук. ⁹Духлэн емышьёсыз таёеесь: зеч сямо луон, шонерлыко, зэмлыко улон. ¹⁰Инмарлы ярамон луоноез сярись тодыны тырше. ¹¹Емыш сётйсьтэм пеймытлыклен ужъёсаз эн пыриське, соосты шарае, кыре поттэ. ¹²Уго сыёе адямиос сярись, мар соос лушкемен лэсьто, вераны ик възьыт. ¹³Ваньмыз та ужъёс югыт азын шарае поттйсько. Уго югыт ваньзэ шарае поттэ, со ачиз югыт. ¹⁴Соин ик шуэмын:

”Султы, кёлйсь,
кулэмысь улзёса султы,
Христос тонэ югдытоз”.*

¹⁵Чаклаське, сак улэ. Укылтэмъёс кадь эн улэ, визьмо муртъёс кадь улэ. ¹⁶Дыр дэс юнме эн быдтэ, кескич нуналъёс вуэмын уго. ¹⁷Укылтэмесь эн луэ, Инмарлэсь эриксэ валаны тырше. ¹⁸Винаез кудзытозяды эн юэ, со бордысь азыса-калгыса улон поттэ. Духен тыр улэ. ¹⁹Кусапады псалом чирдыса, данъян кылбуръёсын, духовной кырзаныёсын огдэс визьмалэ. Вань сюлмысьтыды кырзаса, Кузё-Инмарез даньяса улэ. ²⁰Асьмелэн Кузё-Инмармылэн Иисус Христослэн нимыныз котьку но ваньмыз понна Инмар Атайлы тау каре.

²¹Инмарлэсь кышканэн ог-огдылы тэрытске. ²²Кышномуртъёс! Кузё-Инмарлы кадь, кузпальёстылы тэрытске, ²³малы ке шуоно, пиосмурт кышноезлы йыр луэ озьы, кызыы Христос Черклы йыр луэ. Со ик Черклэн – Мугорлэн Утисез луэ. ²⁴Кызыы Черк Христослы тэрытске, озьы ик кыш-

* 5:14 Ис. 26:19; 60:1.

номуртъёс но асьтэлэн кузпальёстылы котьмар ласянь тэрытске.

²⁵Пиосмуртъёс! Яратэлэ асьтэлэсь кышноостэс, кызыы Христос Черкез яратйз. Со понна Со Ассэ сётйз. ²⁶Сое Со вуын дун-сьöлыктэм кариз, кыл пыр чылкытатйз, – ²⁷Аслаз аяз данлыко Черкез султытон понна, кудйзлэн виштыез но, шекез но, нокыче изьянэз но öвöл, дун-сьöлыктэм, дун-шек-тэм со мед луоз вал шуыса. ²⁸Озыы ик воргоронъёс но асьсэлэсь кышнооссэс, асьсэлэсь мугорзэс кадь, яратыны кулэ: кин кышнозэ яратэ, со ассэ яратэ. ²⁹Уго нокин но, ноку но аслэсьтыз мугорзэ синазь-кыль öз на кары. Котькудйз адями ас мугорзэ сюдэ, шунтэ озыы, кызыы Кузё-Инмар но Черкез сюдэ, шунтэ, ³⁰малы ке шуоно, асьмеос Христослэн Мугорызлэн люкетъёсыз луиськомы Солэн Мугорызлэсь, Солэн лыосызлэсь. ³¹Соин ик адями аслэсьтыз атайзэ, анайзэ кельтоз но аслаз кышноез борды лякиськоз, соос кыкназы одйг лул-мугор луозы. ³²Та ватйськыса улйсь зэмлык пай-мымон мур, мон верасько Христос сярысь, Черк сярысь. ³³Котькудйз тй пöлысь аслэсьтыз кышнозэ ассэ ачиз кадь мед яратоз; нош кышномурт аслэсьтыз картсэ гажаса, сйлы карыса мед улоз.

6-тй ЛЮКЕТ

¹Нылпиос! Кузё-Инмарлы ярамон мед луоды шуыса анай-атайёстылы тэрытске, уго тазыы улон – со шонер улон. ²Атайдэ но анайдэ сйлы кар” –

тазъы вера сйзйськонэз ванё одйгез курон-косон, – ³”Тыныд умой мед луоз, музейем вылын кема мед улод шуыса”. ⁴Тй но, атайёс, асьтэлэсь нылпиостэс эн керзегъяськытэ, Кузё-Инмарлэн дышештонэз, валэктон-визьманъёсыз вылэ пыкиськыса соосты будэтэ.

⁵Ляльчиос! Асьтэлэн музейем вылысь кузёостылы, Христослы кадь, чылкыт сюлмыныды, кыш-каса, куалектыса тэрытске. ⁶Адямиослы возматскон понна гинэ өвёл, кызы адямиослы кельшыны тыршисьёс лэсьто, нош тй, Христослэн ляльчиосыз кадь, Инмарлэсь эриксэ лулысь-сюлмысь быдэсьялэ. ⁷Адямиослы кадь өвёл, Кузё-Инмарлы кадь лулысь-сюлмысь тыршыса улэ. ⁸Тодэлэ, котькудйз но адями зеч ужез понна Кузё-Инмарлэсь кузьым басьтоз – ляльчи-а со, яке эрико адями-а со. ⁹Тй но, кузёос, ляльчиосыныды тазы улэ: кышкатыса-курдатыса соосты эн возе. Тодэ: тйляд но, соослэн но Инмын одйг Кузё-Инмарды. Со ваньзэ одйг кадь яратэ, огзэ но улийё-вылийё уг кары.

¹⁰Эшшо тае верало на: агай-выньёсы, Кузё-Инмар бордын, Солэн туж бадзым кужмыныз юнматске. ¹¹Дьяволлэн кескич ужъёсызлы пумит сылыны тй мед быгатоде шуыса, Инмарлэсь вань ожмаськон тйрлыкъёссэ вылады дйсьялэ, ¹²малы ке шуоно, асьмеос ум нюръяськиське адями лулы, мугорлы пумит, асьмеос нюръяськиськомы сьод кужымъёслы, соослэн кузёоссылы пумит, – пеймыт дуннеен кивалтйсьёслы, инмысь урод духъёслы пумит. ¹³Соин ик Инмарлэсь ожмаськон

тйрлыкьёссэ дйсялэ, урод нунал вуиз ке, соослэн пумитазы султыны, ваньзэ чиданы но пумозяз возиськыны мед быгатоды. ¹⁴Султэ, юн сылэ, кусьёстэс зэмлыкен думе, шонер улонлэсь корт дйсьсэ дйсялэ. ¹⁵Тупаса улон сярысь Зеч Иворез тодытыны пыдысьтыды пыдкучанды дась мед луоз. ¹⁶Эшшо осконлэсь щитсэ кияды басьтэ, соин кескичлэсь Зырдатыса лэзьям вань ньольёссэ кысыны быгатоды. ¹⁷Эшшо, утиськонлэсь корт изьызэ басьтэ, Духлэсь мечсэ – Инмар Кылэз кияды кутэ. ¹⁸Духен тыр луыса, ялан молитваос лыдзыса, вöсьякыса, сэзь-йыгмыт улэ. Вань вöсьяськись калык понна сьолмысьтыды вöсьяське. ¹⁹Инмар кыл сярысь вераськыны кутски ке, соку ик мон кышкатэк Зеч Иворлэсь ватйськыса улйсь зэмлыксэ усьтыны мед быгатом шуыса, мон понна но вöсьяське. ²⁰Жилье дурылыса ыстэм мурт мон, Зеч Ивор понна ужасько-тыршисько. Кызьи кулэ озьи, кышкатэк Зеч Иворез мед тодытысал шуыса, мон понна вöсьяське.

²¹Нош тйляд мынэсьтым югдурме, ужьёсме тодэмды потйз ке, ваньмыз сярысь тйледлы Тихик ивортоз, – гажано братмы, Кузё-Инмарлы оскымон ужась-тыршись. ²²Сое мон тй доры со понна ыстйсько: ми сярысь иворьёсты тй мед тододы но тйлесьтыд сьолэмдэс со мед буйгатоз шуыса.

²³Инмар Атайлэсь но Кузё-Инмарлэсь Иисус Христослэсь агай-выньёслы каньыллыко, яратыса, оскыса улон сйзисько. ²⁴Кузё-Инмармес Иисус Христосэз ваньмызлы пумтэм мур яратйсьёслы Инмар дэлетсэ мед сётоз. Аминь.